



Terenga 2: Hōtaka 44 – E...ai

Ko te reo whakahei tēnei e whakamene nei i ngā apataki o te reo kāmehameha i waiho mai ai hei kura mā ngā iwi puta noa. Nau mai, tauti mai kia rangiwhāwhā te kitea, te rangona o taua kura i ngā motu nei.

Hei Mahi Whakarongo

Ka whakarongo tātou ki ngā whakaaro o Reverend Te Hira Paenga e pā ana ki te reo Māori i tea o mātauranga. Anei ngā pātai.

1. He aha te rongoā e ora ai te reo Māori?
2. E mānukanuka ana a Te Hira ki te aha?
3. Ka puta ngā painga i te aha hei tā te kaiako nō Kings College?

He Whakamārama

Anei te kōrero i puta i te kaikōrero o te wāhanga tuatahi:

E rangatira ai te reo, me kounga.

Anei ngā wāhanga matua o tēnei whakatakatoranga:

E (kupu mahi/kupu āhua) **ai te** (kupu ingoa), **me** (kupu mahi/kupu āhua).

E rongo **ai** koe ki aku pātai, **me** mutu te kōrero.

E kite **ai** koe i te papa, **me** whakatata mai.

E tutuki **ai** te mahi, **me** mahi ngātahi.

He rite te tikanga o te rerenga 'E...ai' ki te rerenga 'Kia ... ai'. E rua ngā wāhanga o ēnei momo rerenga.

Me mahi i tētehi mahi kia puta ai, e puta ai rānei tētehi hua. Ko te hua ka noho ki waenganui i te 'E me te ai' i te 'Kia me te ai' rānei.

Hei Manatu

Ko te kōrero hei manatu mā tātou i te rā nei e hāngai ana ki ngā mātua me ngā tamariki.

Ka rangona te kōrero nei... "Ka taea he inu?" x

Kātahi rā te pākehā o te hanga o tērā kōrero. Ko te mate hoki, kei te kākahuria te whakatakatoranga reo Pākehā e ngā kupu Māori. Anei kē tētehi huarahi Māori ake ki te tono i tētehi inu.

"Tēnā homai he inu." Ko tēnei rānei...

"He inu māku, e Mā."

Hei Mahi

Whakamāorihia ēnei rerenga:

1. In order to reap the benefits, one must do the work.
2. In order to know your identity, you must know your genealogy.
3. In order to achieve your goals, you should put them in writing.
4. In order to understand the language, you should start by learning vocabulary.
5. In order for peace to reign, the fighting must stop.

Whakautu:

1. E kitea ai ngā hua, me mahi i te mahi.
2. E mōhio ai koe ko wai koe, me mātua mōhio ki tō whakapapa.
3. E tutuki ai ō wawata, me āta tuhi.
4. E mārama ai koe ki te reo, me tīmata ki te ako kupu hou.
5. E tau ai te rongo, me mutu te whawhai.